

孝経

慶長板

原存
賣事無用

WA 7
7

古文孝経 1冊 WA 7-7 00-001

国立国会図書館



壽經慶長
已亥刊行



古文孝經序



孔安國



孝經者何也孝者人之高行經常也自有天地人民以來孝道著矣上有明王則大化滂流充塞六合若其無也則斯道滅息當吾先君孔子之世周失其柄諸侯力爭道德既隱禮誼又廢至乃臣弑其君子弑其父亂逆無紀莫之能正是以夫子每於間居而歎述古之孝道也夫子敷先王之教於魯之洙泗門

徒三千人而達者七十有二貫首弟子顏回
閔子騫冉伯牛仲弓性也至孝之自然皆不
待諭而悟者也其餘則怵怵憤憤若存若亡
唯曾參躬行匹夫之孝而未達天子諸侯以
下揚名顯親之事因侍坐而諮問焉故夫子
告其議於是曾子喟然知孝之爲大也遂集
而錄之名曰孝經與五經并行於世逮乎六
國學校衰廢及秦始皇焚書坑儒孝經由是

絕而不傳也至漢興建元之初河間王得而
獻之凡十八章文字多誤博士頗以教授後
魯恭王使人壞夫子講堂於壁中石函得古
文孝經二十二章載在竹牒其長尺有二寸
字科斗形魯三老孔子惠抱詣京師獻之天
子天子使金馬門待詔學士與博士群儒從
隸字寫之還子惠一通以一通賜所幸侍中
霍光光甚好之言爲口實時王公貴人咸神

秘焉比於禁方天下競欲求學莫能得者每
使者至魯輒以人事請索或好事者慕以錢
帛用相問遺魯吏有至帝都者無不齎持以
爲行路之資故古文孝經初出於孔氏而今
文十八章諸儒各任意巧說分爲數家之誼
淺學者以當六經其大車載不勝反云於孔
氏無古文孝經欲矇時人度其爲說誣亦甚
矣吾愍其如此發憤精思爲之訓傳悉載本

文萬有餘言朱以發經墨以起傳庶後學者
覩正誼之有在也今中秘書皆以魯三老所
獻古文爲正河間王所上雖多誤然以先出
之故諸國往往有之漢先帝發詔稱其辭者
皆言傳曰其實今文孝經也昔吾逮從伏生
論古文尚書誼時學士會云出叔孫氏之門
自導知孝經有師法其說移風易俗莫善於
樂謂爲天子用樂者萬邦之風以知其盛衰

衰則移之以貞盛之教淫則移之以貞固之
風皆以樂聲知之知之則移之故云移風易
俗莫善於樂也又師曠云吾驟歌南風多死
聲楚必無功即其類也且曰庶民之愚安能
識音而可以樂移之乎當時衆人僉以爲善
吾嫌其說迂然無以難之後推尋其意殊不
得尔也子游爲武城宰作弦歌以化民武城
下邑而猶化之以樂故傳曰夫樂以關山川

之風以曜德於廣遠風德以廣之風物以聽
之修詩以詠之修禮以節之又曰用之邦國
焉用之鄉人焉此非唯天子用樂明矣夫雲
集而龍興虎嘯而風起物之相感有自然者
不可謂毋也胡笳吟動馬蹠而悲黃老之彈
嬰兒起舞庶民之愚愈於胡馬與嬰兒也何
爲不可以樂化之經又云敬其父則子悅敬
其君則臣悅而說者以爲各自敬其爲君父

之道臣子乃浼也余謂不然君雖不君臣不
可以不臣父雖不父子不可以不子若君父
不敬其為君父之道則臣子便可以忿之耶
此說不通吾為傳皆弗之從焉也

古文孝經

孔氏傳

開宗明義章第一

仲尼間居曾子侍坐子曰參先王有至德要
道以訓天下民用和睦上下亡怨女知之乎
曾子避席曰參弗敏何足以知之乎子曰夫
孝德之本也教之所繇生也復坐吾語女身
體髮膚受于父母弗敢毀傷孝之始也立身
行道揚名於後世以顯父母孝之終也夫孝

始於事親中於事君終立於身大雅云立念
亦祖聿修其德

天子章第二

子曰愛親者弗敢惡於人敬親者弗敢慢於
人愛敬盡於事親然後德教加於百姓刑於
四海蓋天子之孝也呂刑云一人有慶兆民
賴之

諸侯章第三

子曰居上不驕高而不危制節謹度滿而不
溢高而不危所以長守貴也滿而不溢所以
長守富也富貴弗離其身然後能保其社稷
而和其民人蓋諸侯之孝也詩云戰戰兢兢
如臨深淵如履薄冰

卿大夫章第四

子曰非先王之法服弗敢服非先王之法言
弗敢導非先王之德行弗敢行是故非法弗

言非道弗行口無擇言身無擇行言滿天下
亡口過行滿天下亡怨惡三者備矣然後能
保其祿位而守其宗廟蓋卿大夫之孝也詩
云夙夜匪懈以事一人

士章第五

子曰資於事父以事母其愛同資於事父以
事君其敬同故母取其愛而君取其敬兼之
者父也故以孝事君則忠以弟事長則順忠

順不失以事其上然後能保其爵祿而守其
祭祀蓋士之孝也詩云夙興夜寐亡忝介所
生

庶人章第六

子曰因天之時就地之利謹身節用以養父
母此庶人之孝也

孝平章第七

子曰故自天子以下至于庶人孝亡終始而

患不及者未之有也

三才章第八

曾子曰甚哉孝之大也子曰夫孝天之經也地之誼也民之行也天地之經而民是則之則天之明因地之利以訓天下是以其教弗肅而成其政不嚴而治先王見教之可以化民也是故先之以博愛而民莫遺其親陳之以德誼而民興行先之以敬讓而民弗爭導

之以禮樂而民和睦示之以好惡而民知禁

詩云赫赫師尹民具瞻

孝治章第九

子曰昔者明王之以孝治天下也弗敢遺小國之臣而况於公侯伯子男乎故得萬國之歡心以事其先王治國者弗敢侮於鰥寡而况於士民乎故得百姓之歡心以事其先君治家者弗敢失於臣妾之心而况於妻子乎

故得人之歡心以事其親夫然故生則親安
之祭則鬼享之是以天下和平災害不生禍
亂不作故明王之以孝治天下也如此詩云
有覺德行四國順之

聖治章第十

曾子曰敢問聖人之德亡以加於孝乎子曰
天地之性人爲貴人之行莫大於孝孝莫大
於嚴父嚴父莫大於配天則周公其人也昔

者周公郊祀后稷以配天宗祀文王於明堂
以配上帝是以四海之內各以其職來祭夫
聖人之德又何以加於孝乎是故親生毓之
以養父母曰嚴聖人因嚴以教敬因親以教
愛聖人之教不肅而成其政不嚴而治其所
因者本也

父母生績章第十一

子曰父子之道天性也君臣之誼父母生之

續莫大焉君親臨之厚莫重焉

孝優劣章第十二

子曰不愛其親而愛他人者謂之悖德不敬其親而敬他人者謂之悖禮以訓則昏民亡則焉不宓於善而皆在於凶德雖得志君子弗從也君子則不然言思可導行思可歛德誼可尊作事可法容止可觀進退可度以臨其民是以其民畏而愛之則而象之故能成

其德教而行其政令詩云淑人君子其儀不

忒

紀孝行章第十三

子曰孝子之事親也居則致其敬養則致其樂疾則致其憂喪則致其哀祭則致其嚴五者備矣然後能事其親事親者居上不驕爲下而不亂在醜不爭居上而驕則亡爲下而亂則刑在醜而爭則兵此三者不除雖日用

三牲之養疏爲弗孝也

五刑章第十四

子曰五刑之屬三千而辜莫大於不孝要君者亡上非聖人者亡法非孝者亡親此大亂之道也

廣要道章第十五

子曰教民親愛莫善于孝教民禮順莫善于弟移風易俗莫善於樂安上治民莫善於禮

禮者敬而已矣故敬其父則子悅敬其兄則弟悅敬其君則臣悅敬一人而千萬人悅所敬者寡而悅者衆之此謂要道也

廣至德章第十六

子曰君子之教以孝也非家至而日見之教以孝所以敬天下之爲人父者也教以弟所以敬天下之爲人兄者也教以臣所以敬天下之爲人君者也詩云愷悌君子民之父母

非至德其孰能訓民如此其大者乎
應感章第十七

子曰昔者明王事父孝故事天明事母孝故事地察長幼順故上下治天地明察鬼神章矣故雖天子必有尊也言有父也必有先也言有兄必有長也宗廟致敬不忘親也修身慎行恐辱先也宗廟致敬鬼神著矣孝弟之至通於神明光於四海亡所不暨詩云自東

自西自南自北亡思不服

廣揚名章第十八

子曰君子事親孝故忠可移於君事兄弟故順可移於長居家理故治可移於官是以行成於內而名立於後世矣

閨門章第十九

子曰閨門之內具禮矣乎嚴親嚴兄妻子臣妾繇百姓徒役也

諫諍章第二十

曾子曰若夫慈愛龔敬安親揚名參聞命矣
敢問子從父之命可謂孝乎子曰參是何言
與是何言與言之不通耶昔者天子有爭臣
七人雖無道不失天下諸侯有爭臣五人雖
無道弗失其國大夫有爭臣三人雖無道弗
失其家士有爭友則身弗離於令名父有爭
子則身弗陷於不義故當不諠則子不可以

不爭于父臣不可以不爭於君故當不諠則
爭之從父之命又安得爲孝乎

事君章第二十一

子曰君子之事上也進思盡忠退思補過將
順其美匡救其惡故上下能相親也詩云心
乎愛矣遐不謂矣忠心臧之何日忘之


古文孝經終

4
8

古文孝經 1冊 WA7-7 00-015

国立国会図書館





古文孝経 1冊 WA 7-7 00-016

国立国会図書館

